

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијси савјет*

**Zaključak o odbacivanju Prijave koncentracije  
fizičkog lica Saif-a Jaffar Suhail Markhan Alketbi (..)\*\*<sup>1</sup>**

**Sarajevo  
april, 2024. godine**

---

<sup>1</sup> podaci predstavljaju poslovnu tajnu u smislu člana 38. Zakona o konkurenciji



**Broj: UP-01-26-1-029-20/22**  
**Sarajevo, 24.04.2024. godine**

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (2), a u vezi sa članom 12. Zakona o konkurenciji („Službeni glasnik BiH“, br. 48/05, 76/07 i 80/09), rješavajući po Prijavi koncentracije fizičkog lica Saif-a Jaffar Suhail Markhan Alketbi (..)\*\*, zaprimljenoj dana 15.11.2022. godine pod brojem: UP-01-26-1-029-1/22 na 7. (sedmoj) sjednici održanoj dana 24.04.2024. godine, donijelo je

### **Z A K L J U Č A K**

1. Odbacuje se Prijava koncentracije fizičkog lica Saif-a Jaffar Suhail Markhan Alketbi, (..)\*\*, radi nepostojanja koncentracije, u smislu člana 12. stav (1) Zakona o konkurenciji.
2. Obavezuje se fizičko lice Saif Jaffar Suhail Markhan Alketbi, (..)\*\* da uplati administrativnu taksu u iznosu od 1.000,00 KM (hiljadu konvertibilnih maraka) u korist Budžeta institucija Bosne i Hercegovine.
3. Ovaj Zaključak bit će objavljen u «Službenom glasniku BiH», službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće BiH (u daljem tekstu: Konkurencijsko vijeće) je dana 15.11.2022. godine pod brojem: UP-01-26-1-029-1/22 zaprimilo podnesak pod nazivom *Prijava koncentracije iz predostrožnosti* (u daljem tekstu: Prijava) gdje se navodi da je riječ o transakciji posrednog sticanja 43,4% udjela u Fortenova Group d.d., Marijana Čavića 1, 10 000 Zagreb, Republika Hrvatska (u daljem tekstu: Ciljano društvo) od strane sticaoca fizičkog lica Saif-a Jaffar Suhail Markhan Alketbi, (..)\*\* (u daljem tekstu: Podnosilac prijave ili Sticalac).

U Prijavi se, između ostalog, navodi sljedeće:

- Prijava je podnesena, u smislu člana 16. stav (1) Zakona o konkurenciji, obzirom da je pravni osnov predmetne koncentracije (..)\*\*.
- Podnosioci prijave su naveli da predmetnu koncentracije imaju namjeru prijaviti organima nadležnim za konkurenciji u Crnoj Gori, Srbiji i Sloveniji.

- Kako se navodi u dopuni Prijave od 09.02.2023. godine ista se podnosi Konkurencijskom vijeću iz predostrožnosti, jer po mišljenju Podnosioca prijave, Predložena transakcija ne ispunjava pragove za podnošenje prijave u Bosni i Hercegovini koji su predviđeni članom 14. stav 1. Zakona. Ciljno društvo je ostvarilo prihod od 8 miliona BAM u BiH ali Sticalac nije ostvario nikakav prihod u BiH u 2022. godini (ni u 2021. godini). Isto tako isključuje mogućnost da Ciljno društvo ima tržišni udio od preko 40% na određenim tržištima proizvoda u Bosni dok je tržišni udio Sticaoca nula na bilo kom tržištu u Bosni i Hercegovini.
- Postoji *Izjava o tačnosti i istinitosti podataka u prijavi koncentracije* koju je 02. februara 2023. godine potpisao Saif Jaffar Suhail Markhan Alketbi (u dvojezičnoj formi) sa kopijom pasoša istog kao i dokaz o uplati administrativne takse (..)\*\*\*.

Konkurencijsko vijeće je zatim naknadno zaprimilo podneske Podnosioca prijave zaprimljene pod brojem: UP-01-26-1-029-2/22 i broj: UP-01-26-1-029-3/22 (dana 13.12.2022. godine i dana 12.01.2023. godine).

Zahtjev za dopunom informacije Konkurencijsko vijeće je uputilo aktom broj: UP-01-26-1-029-4/22 dana 23.01.2023. godine, aktom broj: UP-01-26-1-029-7/22 dana 15.02.2023. godine i aktom broj: UP-01-26-1-029-9/22 dana 03.03.2023. godine na koji je odgovoreno podneskom zaprimljenim pod brojem: UP-01-26-1-029-5/22 dana 01.02.2023. godine, podneskom broj: UP-01-26-1-029-6/22 dana 09.02.2023. godine, podneskom broj: UP-01-26-1-029-8/22 dana 23.02.2023. godine, podneskom broj: UP-01-26-1-029-10/22 dana 08.03.2023. godine te podneskom broj: UP-01-26-1-029-11/22 dana 16.03.2023. godine.

Konkurencijsko vijeće je nakon zaprimanja punomoći za primanje pismena od Podnosioca prijave, aktom broj: UP-01-26-1-029-12/22 dana 23.03.2023. godine, zatražilo i informaciju, između ostalog, da li je odlučeno o predmetnoj transakciji u zemljama u kojima je, kako je navedeno u Prijavi, ista prijavljena – Srbija, Crna Gora, Slovenija te ukoliko jeste da dostave odluke kojima je odlučeno po istom (ili informaciju u kojoj je fazi postupak ocjene) kao i informaciju da li podnosilac prijave ima namjeru prijaviti transakciju u Republici Hrvatskoj obzirom da je Ciljno društvo iz Republike Hrvatske.

Podnesak sa odgovorom zaprimljen je dana 04.04.2023. godine pod brojem: UP-01-26-1-029-13/22 u kojem je, između ostalog, navedeno da su Prijave koncentracije u Srbiji i Crnoj Gori podnesene 15. novembra 2022. godine te 30. novembra 2022. godine u Sloveniji te su postupci još uvijek u toku. Prijava koncentracije u Republici Hrvatskoj nije podnesena obzirom da pragovi za prijavu nisu ispunjeni.

Konkurencijsko vijeće je dana 30.06.2023. godine pod brojem: UP-01-26-1-029-14/22 zaprimilo podnesak Podnosioca prijave u vezi sa zaštitom podataka koji predstavljaju poslovnu tajnu.

Obzirom da protok vremena Konkurencijsko vijeće se obratilo još jednom Podnosiocu prijave aktom broj: UP-01-26-1-029-15/22 dana 22.11.2023. godine u kojem je zatražilo informaciju da li ostaju kod Prijave, da li je došlo do nekih promjena/dešavanja koje bi bile od važnosti Konkurencijskom vijeću za odlučivanje po istoj te da li je o predmetnoj transakciji/koncentraciji bilo koja jurisdikcija, odnosno tijelo za konkurenciju osim Konkurencijskog vijeća BiH u međuvremenu odlučilo te ukoliko jeste potrebno je da navedene akte dostave Konkurencijskom vijeću.

Konkurencijsko vijeće je dana 01.12.2023. godine pod brojem: UP-01-26-1-029-16/22 na traženo zaprimilo podnesak Podnosioca prijave u kojem se navodi da Podnosilac ostaje kod podnesene Prijave te da nije bilo promjene u strukturi predložene kupoprodaje/transakcije.

Konkurencijsko vijeće je dana 23.02.2024. godine pod brojem: UP-01-26-1-029-17/22 zaprimilo podnesak Podnosioca prijave u kojem se navodi da niti u jednoj jurisdikciji još uvijek nije odlučeno po pitanju prijave koncentracije, koje su također podnesene u novembru 2022. godine.

Uz navedeno, istaknuto je da je u međuvremenu došlo do internog rekonstruiranja u smislu da je Merkator BH d.o.o. Sarajevo pripojen privrednom subjektu Konzum d.o.o. Sarajevo.

Po prijemu cjelokupne dokumentacije Konkurencijsko vijeće je utvrdilo da je Prijava kompletna, te izdalo Potvrdu o prijmu kompletne i uredne Prijave, u skladu sa članom 30. stav (3) Zakona, dana 23.04.2024. godine pod brojem: UP-01-26-1-029-18/22.

## **1. Učesnici predmetne transakcije**

Prijava koncentracije se odnosi na posredno sticanje 43,4% udjela u društvu Fortenova grupa d.d., Marijana Čavića 1, 10000 Zagreb, Hrvatska (u daljem tekstu: FNG ili Ciljno društvo ili Fortenova grupa), od strane fizičkog lica Saif-a Jaffar Suhail Markhan Alketbi, (..)\*\*\*.

Predložena transakcija se odnosi na direktno sticanje 100% udjela u ruskom društvu SBK ART LLC, 125363, Ruska Federacija, Moskva, opštinski okrug Južni Tušino, Skhodnenskaya ulica, 6 (sjedište do 26. januara 2023. godine bilo je 125167, Ruska Federacija, Moskva, opštinski okrug Koroševski, Leningradsky pr-kt, 37A, zgrada 4, sprat / kancelarija 10/33 A73) (u daljem tekstu: SBK Art).

SBK Art posjeduje 41,82% depozitnih potvrda u Fortenova Group STAK Stichting, (u daljem tekstu: FNG STAK) koja je matično društvo FNG grupe društava.

Odvojeno od navedenog Predložena transakcija obuhvata i kupovinu 1,59% depozitnih potvrda FNG STAK od Sberbanke Rusije.

### **1.1. Podnosilac prijave**

Fizičko lice Saif Jaffar Suhail Markhan Alketbi, (..)\*\*\*.

U prilogu podneska koji je zaprimljen pod brojem: UP-01-26-1-029-3/22 dana 12.01.2023. godine dostavljen je pregled vlasničkih udjela Saif Jaffar Suhail Markhan Alketbi u sljedećim društvima, zajedno sa ostvarnim prihodima u 2021. godini i to:

- (..)\*\*\*.

Posjeduje i (..)\*\*\* koje je osnovano kao društvo posebne namjene u aprilu 2022. godine za potrebe predmetne transakcije.

Saif Jaffar Suhail Markhan Alketbi, (..)\*\*\* ne posluje u Bosni i Hercegovini, tj. nema u vlasništvu niti pod svojom kontrolom ni jedno pravno lice i nije ostvario prihod u 2021. godini ni 2022. godini u Bosni i Hercegovini.

### **1.2. Ciljano društvo**

Matično društvo Ciljnog društva je (..)\*\*\*.

(..)\*\*\*.

Fortenova grupa, registrovana na Trgovačkom sudu u Zagrebu pod brojem: 081179147, je jedno od najvećih društava u Jugoistočnoj Evropi sa više od 100 robnih marki u svom portfoliju. Posluje na šest ključnih tržišta Jugoistočne Evrope na kojima plasira preko 4.000 proizvoda i pruža veliki broj usluga. Ključni sektor poslovanja FNG su sektor maloprodaje, sektor za proizvodnju napitaka, sektor za proizvodnju jestivih ulja, sektor za proizvodnju svežeg i obrađenog mesa, sektor za proizvodnju mlijeka i mliječnih proizvoda, kao i poljoprivredna proizvodnja.

### **1.2.1. Povezana društva Ciljanog društva u Bosni i Hercegovini**

Fortenova grupa u Bosni i Hercegovini u vlasništvu ima sljedeća povezana društva i to:

- KONZUM trgovina na veliko i malo d.o.o., Kamenolom br 10, Sarajevo-Ilidža, Sarajevo registrovan na Općinskom sudu u Sarajevu pod brojem: 65-01-0623-10
- M-BL Društvo za trgovinu na veliko i malo d.o.o., Aleja Svetog Save 69, 78000 Banja Luka, registrovan na Okružnom privrednom sudu u Banja Luci pod brojem: 57-01-0255-17
- MERCATOR-BH Trgovina na veliko i malo d.o.o., Blažuj bb, Ilidža, 71000 Sarajevo registrovan na Općinskom sudu u Sarajevu pod brojem: 65-01-0542-10
- PIK BH d.o.o., Svetosavska ulica bb, Laktaši, registrovan na Okružnom privrednom sudu u Banja Luci pod brojem: 57-01-0258-13
- Sarajevski kiseljak d.o.o., Kraljice Mira 7, Kiseljak, registrovan na Općinskom sudu u Sarajevu pod brojem: 51-01-0359-19
- Super Kartica d.o.o., Ložionička 16, Sarajevo, registrovan na Općinskom sudu u Sarajevu pod brojem: 65-01-0492-14
- Zvijezda d.o.o., Rajlovačka bb, Sarajevo, registrovan na Općinskom sudu u Sarajevu pod brojem: 65-01-0828-08
- BOREAS d.o.o. Kreševo, Polje bb, Kreševo, registrovan na Općinskom sudu u Sarajevu pod brojem: 51-01-0159-09
- ZEOS eko-sistem, Društvo za postupanje sa otpadnom električnom i elektronskom opremom, Tvornička 3, Ilidža, Sarajevo, registrovan na Općinskom sudu u Sarajevu pod brojem: 65-01-0492-12.

## **2. Pravni osnov predmetne transakcije**

Prijava transakcije se odnosi na posredno sticanje 43,4% udjela u društvu Fortenova grupa d.d. od strane fizičkog lica Saifa Jaffar Suhail Markhan Alketbi, (..)\*\*\*.

Pravni osnov predmetne transakcije predstavlja (..)\*\*\*.

Pored objelodanjenih dokumenata (..)\*\*\*, kako se navodi u Prijavi, postoje i drugi propratni dokumenti koji omogućavaju provođenje Predložene transakcije i uglavnom se odnose na finansiranje.

U skladu sa prvim navedenim gore Ugovorom, Kupac će direktno steći 100% udjela u SBK ART d.o.o, koji posjeduje 41,82% depozitnih potvrda koje je izdala FNG STAK, koje je krajnje matično društvo FNG grupe društava.

Zasebno od toga, Kupac će preko Ugovora o Založnim instrumentima položenim na čuvanje kupiti 1,59% depozitnih potvrda koje je izdala FNG STAK i to od Sberbanke iz Rusije.

Sveukupno Kupac će posredno steći 43,4% depozitnih potvrda koje je izdala FNG STAK te oba koraka čine dio Predložene transakcije putem kojih će steći 43,4% udjela u Ciljanom društvu.

### **3. Ocjena predmetne transakcije**

Članom 12. Zakona propisano je šta se sve smatra koncentracijom, dok su članom 14. Zakona propisani uslovi pod kojima su učesnici koncentracije obavezni podnijeti prijavu Konkurencijskom vijeću.

Analizom dostavljenih podataka i informacija Konkurencijsko vijeće je utvrdilo da predmetna transakcija po svom obliku ne predstavlja koncentraciju, u smislu člana 12. stav (1) Zakona jer se ne radi o pripajanju dva nezavisna privredna subjekta budući da fizičko lice kupuje privredni subjekt – ciljano društvo. Također, transakcija se odnosi na posredno sticanje 43,4% udjela u društvu Fortenova grupa d.d. od strane fizičkog lica Saifa Jaffar Suhail Markhan Alketbi te nije riječ o sticanju kontrole kupovinom većine dionica ili udjela osnovnog kapitala, što bi se smatralo koncentracijom u skladu sa članom 12. stav (1) Zakona.

Na osnovu navedenog, fizičko lice nije bilo u obavezi podnijeti Prijavu te je Konkurencijsko vijeće odlučilo kao u dispozitivu ovog Zaključka.

### **4. Administrativna taksa**

Podnosilac prijave na ovaj Zaključak, u skladu sa članom 2. Tarifni broj 108. tačka d) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, br. 30/06, 18/11 i 75/18) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

### **5. Pouka o pravnom lijeku**

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Zaključka.

**Predsjednica**

**Adisa Begić**